

პირველი მატჩი, პირველი მღელვარება

„დინამო“ (თბილისი) - „ჟალგირისი“ (ვილნიუსი) 2:1 (0:1).

თბილისი, ვ. ი. ლენინის სახელობის „დინამოს“ სტადიონი. 7 მარტი.

„დინამო“: გაბელია, კეტაშვილი, ფირცხალავა, (ჯიშკარიანი, 46), ჭეღია, ცვეიბა, ტყებუჩავა, გუბაზი, სულაქველიძე, ქეცბაია, გურული, მესხი (ფანცულაია, 58).

„ჟალგირისი“: იურკუსი, იაკუბაუსკასი, სუკრისტოვი, მაჟეიკასი, იანონისი, პანკრატიევი, ბარანაუსკასი, ივანაუსკასი, ბუმბაკოვი, რასიუკასი, ნარბეკოვასი.

მსაჯი ვ. ბუტენკო (მოსკოვი).

გააფრთხილეს კეტაშვილი.

სსრ კავშირის 51-ე საფეხბურთო ჩემპიონატის სტარტზე თბილისის „დინამოს“ მეტოქედ ვილნიუსის „ჟალგირისი“ ხვდა წილად. ჩემპიონატის პირველ მატჩს, როგორც წესი, მუდამ დიდი მნიშვნელობა ენიჭება, პირველ თამაშში მოპოვებული წარმატება, მასთან ერთად ორი ქულაც დიდ მორალურ და ფსიქოლოგიურ ზეგავლენას ახდენს უშუალოდ ფეხბურთელებზე და მთელს კოლექტივზე, შესაბამისად პერსპექტიულად განაწყობს მაყურებელსაც და გუნდის ქომაგთა ვრცელ საზოგადოებრიობასაც.

ყველაფერი ეს ანბანური საფეხბურთო ჭეშმარიტებაა. მაგრამ აქ კიდევ ერთი ფაქტორია მეტად მნიშვნელოვანი და ანგარიშგასაწიფი, კერძოდ, ვინა გვყავს პირველ მეტოქედ, რა კატეგორიის სიძნელისაა იგი? შეიძლება თუ არა ვილნიუსის „ჟალგირისი“ ჩვენი გუნდისთვის იმ „სასინჯ ქვად“ მივიჩნიოთ, რომელთანაც ჩატარებულმა თამაშმა გარკვეული შთაბეჭდილება უნდა შეგვიქმნას თბილისის „დინამოს“ ახლანდელ სიძლიერეზე, ხოლო თვით გუნდს საკუთარი ძალის რწმენა ჩაუსახოს. „ჟალგირისი“ ახლა ჩვენი ფეხბურთის ერთ-ერთი ფავორიტი, თუ რა თქმა უნდა, მთლიანად გავითვალისწინებთ მისი ბოლო წლების ისტორიას. 1982 წელს ვილნიუსელთა გუნდი ჯერ კიდევ პირველი ლიგის წევრი იყო, 1983 წელს კი უმაღლეს ლიგაში მესხეთე ადგილზე გავიდა. რასაკვირველია, ეს დიდი წარმატება იყო. მომდევნო წლებში „ჟალგირისი“ სტაბილურად თამაშობდა და მტკიცედ იმკვიდრებდა ადგილებს ცხრილის შუაგულში, ხოლო შარშან თავისი არსებობის მანძილზე ყველაზე უკეთეს მაჩვენებელს მიაღწია. ჯერ ერთი, „ჟალგირისმა“ შარშანდელი ზაფხულის მსოფლიო უნივერსიადაზე იუგოსლავიის ქალაქ ზაგრებში მეტად პრესტიჟული შეჯიბრება მოიგო და ჩემპიონის სახელი დაიმკვიდრა, შემდეგ გუნდი საკავშირო ჩემპიონატში მესამე საპრიზო ადგილზე გავიდა და წლეულს შემოდგომით უეფა-ს თასზე ითამაშებს. თუ ამას დავემატებთ სსრ კავშირის თასის გათამაშებაში მიღწეულ წარმატებებს (გუნდი მეოთხედფინალში თამაშობს), ცხადია – ვილნიუსელ ფეხბურთელებთან პირველი თამაშის საფუძველზე თამამად შეგვიძლია ვიმსჯელოთ თბილისის „დინამოს“ ახლანდელ სპორტულ ფორმაზე, მით უმეტეს, რომ „ჟალგირისის“ შემადგენლობაში გამოდიან უკვე ცნობილი მოთამაშეები მეკარე ვ. იურკუსი, მცველი ვ. სუკრისტოვი, ნახევარმცველი ვ. ივანაუსკასი, ფორვარდები ს. ბარანაუსკასი და ა. ნარბეკოვასი. ერთი სიტყვით, გუშინდელი მეტოქე აშკარად ძლიერია და, ჩვენი აზრით, „სასინჯ ქვადაც“ ზედგამოჭრილი.

ეს ფრიალ დიდმნიშვნელოვანი მატჩი მოვიგეთ, თუმცა, გამარჯვებას მხოლოდ უკიდურესად დაძაბულ, შეუპოვარ ბრძოლაში მივალწიეთ, სასტარტო 2 ქულის აღებას დინამოელებმა დიდი ენერჯია და ჯაფა შეაღიეს.

ყოველი მოგებული მატჩი თავისთავად ოპტიმიზმს იწვევს, „ჟალგირისთან“ მოპოვებული გამარჯვებაც მეტად პერსპექტიულია, მაგრამ საჭიროდ მიგვაჩნია ამთავითვე განვაცხადოთ, რომ ჩვენი გუნდის თამაშში ჯერ კიდევ მრავლად შევამჩნიეთ ხარვეზები, გარკვეულ პერიოდებში უსისტემოდ თამაშობდნენ ნახევარმცველები, პასურობდნენ თავდამსხმელები, სტუმრების კართან იშვიათად იქმნებოდა სახიფათო მომენტები, მაგრამ ისიც ცხადია, რომ შარშანდელმა შედარებით ჩვენი გუნდის თამაშში შესამჩნევი პროგრესი იგრძნობა. მოთამაშეები ფიზიკურად კარგად არიან მომზადებული, მათ შეძლეს მაღალი ტემპის შენარჩუნება, დიდი ნებისყოფა გამოიჩინეს და მოგებულ მატჩს ისიც უნდა მივუმატოთ, რომ თბილისის „დინამომ“ გამარჯვებისადმი სწრაფვის პრიზისთვის პირველი მომგებიანი ქულა ჩაიწერა.

„ჟალგირისის“ დამარცხება იოლი არ გახლდათ, მით უფრო, მას შემდეგ, რაც პირველი გოლი 37-ე წუთზე გაიტანა ნარბეკოვასმა. ეს მოხდა ჩინებულად გათამაშებული კომბინაციის შედეგად.

შესვენების შემდეგ თბილისელები თითქმის განუწყვეტლივ, აქტიურად უტევენ. მდგომარეობა ისხნა გუბაზმა, რომელმაც 78-ე წუთზე საკმაოდ შორი მანძილიდან ზუსტად დაარტყა შორეულ კუთხეში, რამდენიმე წუთის შემდეგ კი „ჟალგირისის“ მცველებმა აშკარად აკრძალული ილეთით წააქციეს ქეცბაია, ვ. ბუტენკომ უყოყმანოდ დანიშნა 11-მეტრიანი და გურულმა ზუსტად დაარტყა – 2:1.

პირველი მატჩი, პირველი გამარჯვება, პირველი ქულები! ვფიქრობთ, ეს წარმატება სასიკეთოდ იმოქმედებს ჩვენს ფეხბურთელებზე.

იმასთან დაკავშირებით, რომ მინსკის „დინამომ“ ბელგიის „მეხელენთან“ თასების მფლობელთა თასის ჩატარების შემდეგ გვიან დაბრუნდა შინ, მისი შეხვედრა ერევნის „არარატთან“ 7 მარტის ნაცვლად 8 ივნისისთვის გადაიდო.

დუბლიორთა მატჩი

უმაღლესი ლიგის დუბლიორ ფეხბურთელთა საკავშირო გათამაშების კალენდარული შეხვედრა თბილისის „დინამოსა“ და ვილნიუსის „ჟალგირისის“ შორის დღეს შედგება „დინამოს“ დილმის საწვრთნელ ბაზაზე. დასაწყისი 15 საათზე.

ლელო 8.03.88